

Evening Dogri (NSD)

10-12-2025

खबरां

1. राष्ट्रपति द्रौपदी मुर्मू होरें आखेआ ऐ जे भारत मनुक्खी अधिकारें दी नां छड़ी राक्खी करदा ऐ सगुआं उं'दा सम्मान बी यकीनी बनांदा ऐ, राष्ट्रपति होर मनुक्खी अधिकारें सरबन्धी ध्याड़े दे मौके पर आयोजित कार्यक्रम गी संबोधित करा'रदियां हियां।
2. लोकसभा च चुनावी सुधारें पर चर्चा दरान सियासी पार्टिएं इक-दुए पर आरोप-प्रत्यारोप लाए।
3. भारत दे प्रमुख सांस्कृतिक ते आध्यात्मिक त्योहार देआली गी यूनेस्को दी मनुक्खता दी अमूर्त सांस्कृतिक विरासत दी प्रतिनिधि सूची च शामिल कीता गेआ ऐ, समूलचा राष्ट्र इस उपलब्धि दा जश्न मना करदा ऐ।
4. अमेजॉन ने 2030 तगर भारत च 35 अरब डॉलरें दी रास-पूंजी लाने दा ऐलान कीता ऐ।
5. विदेश सचिव विक्रम मिसरी होरें अमरीका दे बपार.कारोबार सरबन्धी उप.प्रतिनिधि रिक स्विटजर हुंशदे कन्नै मलाटी कीती।
6. सक्काश च भारत नै चेन्नई दे एक्सप्रेस एवन्यू माल च स्कवाश विश्वकप.2025 दे पूल.बी दे अपने पैहले मुकाबले च स्विटजरलैंड गी 4.0 कन्नै हराई दित्ता।

<><><><><><>

Prez. Human Rights

राष्ट्रपति द्रौपदी मुर्मू होरें आखेआ ऐ जे भारत इक ऐसा राष्ट्र बनने लेई प्रतिबद्ध ऐ जित्थे मनुक्खी अधिकारें दी नां छड़ी राक्खी कीती जंदी ऐ सगुआं उं'दा सम्मान बी कीता जंदा ऐ। नमीं दिल्ली च मनुक्खी अधिकारें सरबन्धी ध्याड़े 2025 ते रोजमर्रा दिएं जरूरतें गी जकीनी बनाने बारै आयोजित राष्ट्रीय सम्मेलन गी संबोधित करदे होई राष्ट्रपति होरें आखेआ जे गरिमा पर कोई समझौता नेई कीता जाई सकदा ऐ ते कुसै गी बी ओहदे अधिकारें शा वंचित नेई कीता जाना लोड़चदा। राष्ट्रपति मुर्मू होरें आखेआ जे मनुक्खी अधिकारें सरबन्धी ध्याड़ा, इक न्याऽपूर्ण ते बरोबरी ते दया पर आधारत समाज दी नींह तैयार करदा ऐ। उ'नें आखेआ जे न्याऽ मिलना हर इक माहनुयै दा जन्मसिद्ध अधिकार होना चाहिदा। राष्ट्रपति होरें आखेआ

जे भारत ने मनुक्खी अधिकारें दे वैश्विक ढांचे की आकार देने च महत्वपूर्ण भूमिका निभाई ऐ। उ'नें जिक्र कीता जे संविधान सभा की 15 महिला सदस्यें चा इक हंसा मेहता होरें सार्वभौमिक मनुक्खी अधिकार घोषणापत्र दे मसौदे की तैयार करने च अहम भूमिका निभाई। राष्ट्रपति होरें आखेआ जे देश दे स्वतंत्रता सेनानियें मनुक्खी गरिमा, बरोबरी ते न्याऽ पर आधारित दुनिया की कल्पना कीती ही। सुश्री मुर्मु होरें इस गल्लै पर लोऽ पाई जे बक्ख-बक्ख प्रभावी सरकारी योजनाएं, महिलाएं की आर्थिक भागीदारी ते गरिमा दे माध्यम कन्नै देश की आत्मनिर्भरता मजबूत होई ऐ।

<><><><><><>

LS-Electoral Reforms

लोकसभा च अज्ज चुनावी सुधारें पर फही चर्चा शुरू होई जेदे च हिस्सा लैंदे होई कांग्रेस नेता के.सी वेनुगोपाल होरें आखेआ जे वोट पाने दा अधिकार लोकतंत्र दा इक्क बुनियादी सिद्धांत ऐ। उ'नें दोष लाया जे चुनावी आयोग फर्को-फर्की आह्ला रौंऽ अपना करदा ऐ। वेनुगोपाल होरें इ'ब्बी आरोप लाया जे 2024 दे लोकसभा चुनाव कोला ऐन पैहले इंकम टैक्स रिटर्न फाइल करने च चिर लगने दा हवाला दिंदे होई कांग्रेस पार्टी दे खाते बंद करी दित्ते गे हे। उ'नें बिहार च बड्डे पैमाने पर मतदाताएं दे नांऽ सूचिएं चा कट्टने दा मुद्दा बी पुट्टेआ। तोआई, बीजेपी नेता रविशंकर प्रसाद होरें आखेआ जे विपक्ष जिसलै बी चुनाव हारदा ऐ तां जे ओह चुनावी प्रक्रिया उपर सोआल पुट्टना शुरू करी दिंदा ऐ। उ'नें आखेआ जे बिहार च केई रैलियां करने दे बावजूद बी कांग्रेस पार्टी असेंबली चुनाव च किश गै सीटां जित्ती सकी ऐ।

<><><><><><>

ECI-SIR

निर्वाचन आयोग ने दस्सेआ ऐ जे मतदाता सूचिएं की बशेश नजरसानी दे दुए चरण च हुनै तगर मतदाताएं की 50 करोड़ 96 लक्ख शा मते मतदाता नांऽ पंजीकरण आह्ले फार्म बंडुकी दित्ती गेदे न। एह गिनतरी इस चरण च शामिल होने आह्ले तकरीबन 51 करोड़ मतदाताएं दा 99 इशारिया 9-8 फीसद ऐ। आयोग ने दस्सेआ ऐ जे हुनै तगर 50 करोड़ शाम ते फार्म डिजिटल करी दित्ते गेदे न। मतदाता पंजीकरण फार्म जमा करने की अखीरी तरीक कल्लै धोहड़ी ऐ। उत्थे गै केरल च एहदी अखीरली तरीक 18 दिसंबर ऐ। मतदाता सूचिएं की बशेश नजरसानी दा दुआ चरण 4 नवंबर थमां 9वें राज्यें ते त्रै केंद्र शासित प्रदेशें च शुरू होआ हा। एह राज्य ते केंद्र शासित प्रदेश छत्तीसगढ़, गोवा, गुजरात, केरल, मध्य प्रदेश, राजस्थान, तमिलनाडु, उत्तर प्रदेश, पच्छिम बंगाल, पुद्दुचेरी, लक्षद्वीप ते अंडमान ते निकोबार टापु न।

एह चरण अगले बरें 14 फरवरी गी अखीरली मतदाता सूची दे प्रकाशन दे कन्नै संपन्न होई जाहगा।

<><><><><><>

Amrit-Bharat Stations

सरकारै आखेआ ऐ जे अमृत भारत स्टेशन योजना दे तैहत् 160 रेलवे स्टेशनें दा निर्माण कम्म सबूरा करी लैता गेदा ऐ। अज्ज लोकसभा च पूरक सोआलै दे परते च रेल मंत्री अश्विनी वैष्णव होरें दस्सेआ जे इस योजना दे तैहत् विकास लेई 1300 शा मते स्टेशनें दी पन्धान कीती गेई ऐ। उ'नें गलाया जे सरकार रेलवे स्टेशनें पर यात्री सुविधाएं गी बेहतर बनाने लेई यात्री आवास खेत्तर, यात्री हॉल, पार्किंग ते रेलवे स्टेशनें तगर सौक्खी पुज्ज दा निर्माण करा'रदी ऐ। श्री वैष्णव होरें गलाया जे स्टेशनें दे परतियै विकास दा कम्म यात्री सुरक्षा बक्खी चेचा ध्यान दि'दे होई गै कीता जा'रदा ऐ।

<><><><><><>

PM-Diwali UNESCO

भारत दे प्रमुख सांस्कृतिक ते आध्यात्मिक त्योहारें चा इक, देआली गी अज्ज संयुक्त राष्ट्र शैक्षिक, वैज्ञानिक ते सांस्कृतिक संगठन - यूनेस्को दी मनुक्खता दी अमूर्त सांस्कृतिक विरासत दी प्रतिनिधि सूची च शामिल कीता गेआ ऐ। एहदी घोशणा करदे होई संस्कृति ते सैलसफा मंत्री गजेन्द्र सिंह शेखावत होरें आखेआ जे एहू हर इक भारतवासी लेई इक भावुक पल ऐ। प्रधानमंत्री नरेन्द्र मोदी होरें आखेआ ऐ जे देआली गी यूनेस्को दी अमूर्त सांस्कृतिक विरासत सूची च शामिल कीते जाने कन्नै भारत ते दुनिया भरै च लोक रोमांचित न। सोशल मीडिया पोस्ट च श्री मोदी होरें आखेआ जे देआली भारत दी संस्कृति ते मुल्लें-कदरें कन्नै बड़ी गैहराई कन्नै जुड़ी दी ऐ। उ'नें इस त्योहार गी देशै दी सभ्यता दी आत्मा करार दित्ता। प्रधानमंत्री होरें आखेआ जे एहू त्योहार ज्ञान ते धर्म दा प्रतीक ऐ ते यूनेस्को दी सूची च शामिल होने कन्नै एहदी वैश्विक पन्धान ते लोकप्रियता च होर बाद्दा होग। प्रधानमंत्री होरें कामना कीती जे प्रभु श्री राम हुं'दे आदर्श अनंत काल तगर मनुक्ख जाति दा मार्गदर्शन करदे रौहडन।

<><><><><><>

Diwali UNESCO Shah-Nadda

गृह मंत्री अमित शाह ते केंद्री मंत्री जगत प्रकाश नड्डा होरें देआली गी यूनेस्को दी अमूर्त सांस्कृतिक विरासत दी प्रतिनिधि सूची च शामिल कीते जाने पर खुशी व्यक्त कीती ऐ। सोशल मीडिया पोस्ट च श्री अमित शाह होरें आखेआ जे एहू मान्यता आधुनिक जुगै च बी भारत दी प्राचीन सांस्कृतिक परंपराएं दे महत्व गी दर्शादी ऐ। उत्थे गै, श्री नड्डा होरें आखेआ जे एहू गर्व ते भावुकता दा पल ऐ। उ'नें आखेआ जे एहू मान्यता देश दे इतिहास ते सांस्कृतिक विरासत गी श्रद्धांजलि ऐ। इस मौके पर बदेश मंत्री एस. जयशंकर होरें आखेआ ऐ जे यूनेस्को दी अमूर्त सांस्कृतिक विरासत च देआली गी शामिल कीता जाना, इस त्योहार दे बड़े मते सांस्कृतिक, धार्मिक ते आध्यात्मिक महत्व दी मान्यता ऐ। उ'नें लोकें गी इकजुट करने च एहदी भूमिका पर बी लोऽ पाई।

<><><><><><>

Amazon-India

अमेजॉन ने 2030 तगर भारत च 35 अरब डॉलरें दी रास-पूंजी लाने दा ऐलान कीता ऐ। अमेजॉन दे उभरदे बजारें दे वरिष्ठ उप-अध्यक्ष अमित अग्रवाल होरें अज्ज नमीं दिल्ली च आयोजित अमेजॉन संभव शिखर सम्मेलन दे 6में संस्करण च एहू घोशणा कीती। उ'नें आखेआ जे एहू निवेश विकसित भारत दे नजरिये दे कन्नै अमेजॉन दे विकास दे मूजब ऐ। उ'नें दस्सेआ जे एहदे'नै रोजगार दे 10 मौके पैदा होडन। एहू निवेश एआई क्षमताएं दे विस्तार, साज-समेयान सरबन्धी बुनियादी ढांचे गी मजबूत करने ते रोजगार पैदा करने पर केंद्रित होग, जेहदे'नै लौहके कारोबारें गी समर्थन मिलग। एहदे शा पैहले, माइक्रोसॉफ्ट ने आर्टीफिशियल इंटेलिजेंस च भारत दे नेतृत्व गी दिक्खदे होई बुनियादी ढांचे, कौशल ते समर्थ निर्माण लेई 17 अरब डॉलरें शा मते दे निवेश दी घोशणा कीती ही।

<><><><><><>

RS-Vande Mataram

राज्यसभा च राष्ट्रगीत वंदे मातरम दी 150मीं बर्रेगंड पर चर्चा होई। गृह मंत्री अमित शाह होरें कल वंदे मातरम पर चर्चा दा शुभारंभ कीता हा। कांग्रेस दे जयराम रमेश होरें चर्चा च हिस्सा लैदे होई आरोप लाया जे वंदे मातरम पर एह चर्चा जवाहरलाल नेहरू होरेंगी बदनाम करने दे मकसद कन्नै कीती जा'रदी ऐ। उ'नें आखेआ जे कांग्रेस दे हर सत्र च एह राष्ट्रगीत गाया जंदा हा। कम्युनिस्ट पार्टी दे संतोष कुमार होरें आखेआ जे वंदे मातरम गीत भगत सिंह, चंद्रशेखर आजाद, खुदीराम बोस जेहू ज्हारें स्वतंत्रता सेनानियों ते नेताएं लेई प्रेरणा स्रोत रेहा ऐ। उ'नें आखेआ जे एह राष्ट्र दी आत्मा च बसे दा ऐ ते अज्ज बी सबनें गी प्रेरित करदा ऐ। बीजू जनता दल दे देबाशीष सामंतराय होरें आखेआ जे वंदे मातरम गीत स्वतंत्र भारत दी अवाज हा।

<><><><><><>

Aapka Paisa Aapka Adhikar

प्रधानमंत्री नरेन्द्र मोदी होरें अज्ज लोकें गी 'आपका पैसा, आपका अधिकार' अभियान च हिस्सा लैने दी अपील कीती। लिंकडइन पर इक पोस्ट सांझी करदे होई प्रधानमंत्री होरें आखेआ जे एह नागरिकें लेई इक भुल्ली दी माली संपत्ति गी इक नमें मौके च बदलने दा मौका ऐ। उ'नें आखेआ जे इस पैहलकदमी दा मकसद लोकें गी उ'दी अन्जान जमा राशि, बीमा राशि, लाभांश ते होरनें माली संपत्तियें गी परतियै हासल करने च सक्षम बनाना ऐ।

<><><><><><>

JK Polytechnic

शिक्षा मंत्रालय नै लोकसभा च दस्सेआ ऐ जे कौशल विकास ते उद्यमिता मंत्रालय आसेआ लागू कीती जा'रदी केन्द्र प्रायोजित योजना दे तैहत जम्मू-कश्मीर च 9 नमें पॉलिटेक्निक संस्थान स्थापत कीते गे न। आकाशवाणी दे जम्मू संवाददाता मूजब, इस योजना दा मकसद ओकड़ खेत्तरें च तकनीकी शिक्षा दी पुज्ज गी बधाना ऐ जित्थे एह सुविधा घट्ट उपलब्ध ऐ ते क्लासें, लैबाटरिएं, होस्टलें ते उद्योगें कन्नै सरबन्धत सिखलाई जेहू बुनियादी ढांचे लेई सहायता प्रदान करना ऐ। मंत्रालय ने दस्सेआ ऐ जे इस पैहलकदमी दे तैहत मुल्ल भरै च कुल 170 पॉलिटेक्निक संस्थान स्थापत कीते गे न। सरकारै इब्बी आखेआ ऐ जे तकनीकी संस्थानें

च शासन ते शैक्षणिक मानकें च सुधार आहने दे मकसद कन्नै गुणवत्ता बढाने दे उपाऽ कीते जा'रदे न जि'दे च निगरानी तंत्र ते हाल च शुरु कीती गेदी मेरिट योजना बी शामिल ऐ।

<><><><><><>

Misri US Trade

विदेश सचिव विक्रम मिसरी होरें अमरीका दे बपार-कारोबार सरबन्धी उप-प्रतिनिधि रिक् स्विटजर हुं'दे कन्नै मलाटी कीती। विदेश मंत्रालय नै आखेआ जे दौनें जनें इस दरान भारत ते अमरीका दी मजबूत आर्थिक ते तकनीकी सांझ-भ्याली बारै चर्चा कीती। एहदे अलावा दौनें पक्खें बपार-कारोबार गी अगगे बढाने ते दो-तरफा बपार गी बढावा देने सरबन्धी मौकें सने तगड़ी आपूर्ति श्रृंखला विकसित करने दे मामलें पर बी सलाह-सूत्र कीता ऐ।

<><><><><><>

India-US

भारत ते अमरीका दे बदेशी दफ्तरें बश्कार सलाह-सूत्र आले कार्यक्रम दा कल नमीं दिल्ली च आयोजन होआ। बदेश सचिव विक्रम मिस्री ते अमरीका दे उप-बदेश मंत्री एलिसन हुकर नै इस बैठक दी सांझे तौर पर अध्यक्षता कीती। बदेश मंत्रालय नै दस्सेया जे इस दरान भारत ते अमरीका दी वैश्विक रणनीतिक सांझ-भ्याली दी व्यापक समीक्षा कीती गेई। इस दरान दौनें पक्खें बपार ते रास-पूंजी- रक्षा सहयोग- ऊर्जा सहयोग- तकनीकें- महत्वपूर्ण खनिजें ते विश्वसनीय आपूर्ति श्रृंखला सनें प्रमुख दपक्खी मुद्दें पर चर्चा कीती। बैठक च आपसी हितें आले इलाकाई ते वैश्विक मुद्दें पर बी गल्लबात होई। दौनें पक्खे स्वतंत्र ते मुक्त हिंद-प्रशांत खेतर लेई सांझी वचनबद्धता गी फही पक्का कीता।

<><><><><><>

Railway Spl Trains

ब्हार्ड डोआरियें दे रद्द होने कारण प्रभावत यात्रियें दी सुविधा लेई उत्तर रेलवे दी जम्मू डिवीजन- नमीं दिल्ली ते उधमपुर बश्कार 12 कोला 14 दिसम्बर तगर विशेष “वंदे भारत” रेलगुडी चलाग। गुडी नम्बर 02439 बडुलै 6 बजे नमीं दिल्ली थमां चलयै दपैहरी मगरा 2 बजे उधमपुर पुज्जोग ते बत्तै अम्बालाकैंट- लुधियाना- पठानकोट ते जम्मू तवि स्टेशन पर गै रुकोग। वापसी च गुडी नम्बर 02440 दपैहरी 3 बजे उधमपुर थमां चलोग ते रातीं 11 बजे नमीं दिल्ली पुज्जोग। इस विशेष “वंदे भारत” च कुल 20 डब्बे होगन। यात्रियें गी सलाह दिती जंदी ऐ जे ओ- यात्रा कोला पैहले रेलवे दे अधिकारिक सूत्रें थमां जानकारी लेई लैन।

Australia Teen Social Media Ban

आस्ट्रेलिया 16एं बरे शा हेठली उम्री दे बच्चे लेई सोशल मीडिया दे इस्तेमाल पर बंदिश लाने आला- इस दुनिया दा पैहला मुल्ख बनी गया ऐ। आस्ट्रेलिया च 16एं बरे शा हेठली उम्री दे लक्खां बदे बच्चे पर इस फैसला दा असर पौग- कीजे बक्ख-बक्ख सोशल मीडिया मंच जियां Face Book- Instagram- एक्स- Youtube- Snapchat- Reddit, Tiktok ते होरनें बी अज्जै थमां 16एं बरे शा हेठली उम्री दे बच्चे दे सोशल मीडिया एकाउंट हटाना ते नमें पंजीकरण करना बंद करी देगंन। नियमें दी उल्लंघना करने आली कम्पनियें पर 4 करोड़ 95 लक्ख अमरीकी डालरें तगर दा जुर्माना लाया जाहगा।

<><><><><><>

Squash

सक्वाश च भारत नै चेन्नई दे एक्सप्रेस एवन्यू माल च स्कवाश विश्वकप-2025 दे पूल-बी दे अपने पैहले मुकाबले च स्विटजरलैंड गी 4-0 कन्नै हराई दित्ता ऐ। ध्यानजोग ऐ जे 2023 आहले स्कवाश विश्व कप च भारत नै कैऽ दा तगमा जित्तेआ हा ते मौजूदा विश्व कप श्रृंखला च कल भारत दा मुकाबला ब्राजील दी टीम कन्नै होग।

<><><><><><>